

O Volapükaf lens Löffik !

Egekömob de vaken obik in Litaliyän, kel äbinon vero legudik. Sol mödik, lotidöp gudik, fidäds nekösömik, mens fredik - ekö lised dinas kotenüköl, kel garanon vakeni dialik ! Id ätävob balidnaedo lü zif „Veiona” - zif vönik, jönik (ko bums redülik kodü ston patik, kel pasesebon nilo - jenöfo zif dalabon jini lölo *drimiki* sekü atos) e binon vemo nitedik.

Äkanob i plägön noli oba Litaliyänapüka, ab bi vakenans mödikün us äbinons Deutänans, äplägeb fino noli oba Deutänapüka plu ka ut Litaliyänapüka ! Äs kösömiko, äsäkob anikans tefü pük bevünetik mekavik, ab nek igo ililon dö on ! Pid kion !!

Su pads 74 e 75 kanoy reidön dili telid konota : „*Ab sol nidon ai plu*”. In dil at, notod : „best man” pubon, e pos vöds at epladob stelülü (*). In Linglän, äsi in läns fa on peflunöls, higam välom ai eli „best man,” kel binom flen patik higama in mateds in län at. El „best man” labom gididis anik : samo, kälom valemo dö higam, kipom sefo matedalini, reidom lo vüdäbs dinädü matedafidäd telegramis e kadis, cogom mödo e nüdugom spikanis votik. No sevob, va jenöfo man somik dabinom in mateds in läns votik, ab is el „best man” binom dil vönaoloveikoda lunüpi; seko binom vemo veütik !

Ko spel ladöfik, das Volapükaf lens valöpo okanons dunön bosili, te bosili, ad sevädükön püki obsik votikanes; no glömolös tofili vata, *sedom* kel piano dugimon klifi.

Valikosi Gudikün Oles ed Olikanes,

sedom

Ralph

AB SOL NIDON AI PLU ...

„Glidis, o <Kar!> ” äsagof ome, „Lio stadol-li nu ?”

„Gudiko,” egespikom nelaodiko, „Ed ol-li ? ”

„Plu ka gudiko,” egespikof; „adelo egetob penedi de blod oba ad nunön, das fino etuvom vobi ko gased topik. Ai ävilom vedön gasediman, ed anu labom pöti gudik ad lärnön cali at, e mesed i binon gudik pro primölan.”

„Fredob verno pro om. Spelob, das olabom benoseki mödik ün yels okömöl. Lio panemom-li ? ” esagom ofe:

„Panemom <Max> e lödom ai domü pals” egespikof. „Labol-li i vobodi ?”

„Si, fūmo ! Vobob in gadazän nilü zif. Mesed no binon gretik, ab ai elöfob vobi tefü gadam. Labol-li gadi ?”

„Si e no !” egespikof. „Nek vilon vobön us; sekü atos, yeb binon tio so geilik äs ob !”

El <Kar!> äsmilom. „If vilol osi, okömob ad vobön us, bi labob skili saidik in tef at.”

Jiel <Tabit> älogof omi danöfiko. „No kanobs pelön ole moni mödik,” äsagof.

El <Kar!> älogom ini logs ofik. „Odunob vobi at vilöfo pro ol glato!”

E so ejenos. Dü vigs za luls u mäls, el <Kar!> evobom mödo in gad. Jenöfo ävotafomom gadi pianiko: yebafelili efodom, ejüpom ai, e pla mikebs, flors valasotik e plans jönik äglofons bundano. Da tim gadivoba, jiel <Tabit> äpreparof koledi pro om äs mal danöfa. Igo poso, el <Kar!> äprimom ad visitön vomüli at yunik.

Pos yels tel, el <Kar!> esagom ofe: „Löfob oli, o <Tabit>! Sevob, das no binob so visedälik äs flens votik ola, ab vilob lifädön yelis retik lifa

X:75:99

oba ko ol - atos ofredükos obi plu ka kanob sagön !"

Jiel <Tabit> äkipof nami omik, äkidof oni molädiko ed egespikof:
„Ko desir lölik oba vilob matikön ko ol, o löfäb oba !"

Matedadel äbinon gloriik. Sol änidon nämiko da del lölik e flens
mödik äkömons ad komön in jenot fredikün at. El <Kar> ävälom eli
<Max> as „best man*" oka, e valikos äbinos äs drim jönik pro bofikans.
Poso alans ägolons lü dom palas oma, kiöp ölödons pos geköm de
matedatäv, ad fidön e drinön, e ad benovipön matanapäri; ad kanitön e
danüdön e ad dalilön spikädis. Matedakek, keli ibakof mot jigama,
äbinon gretik, e löpo äbinons flors valasotik labü benosmel jönikün!
Äbinon del ad neai glömon.

Matedavakeni älifädons in pofazifil len mel. Stom äbinon magifik
ün del alik. In dom smalik, keli äloatons pro dels kil, els <Kar> e
<Tabit> äbinos ga spaliks e valikos, kel äbinos büikumo so veütik, no
plu ilabon veüti. Flänü el <Kar>, el <Tabit> äbinof in parad. Doats
onsik ävestigons skini odik dü kids lefäkiik, el <Kar> äkidom nen stopön
lipis, e blötis, e skini sadinasofik koapa lölik ofa. „Löfob oli, o löfäb oba !"
äseifom. Äs balam koapik balidnaedik ävilupon onis in löf nendöfik, el
<Tabit> ädasevof, das atos äbinos föli drimas dibikün oka, e seifölo
dafrediko, äsagof ele <Kar> : „I löfob oli, o löfäb oba, plu ka kanob sagön
osi me vöds teik !" Ed äs kobod te bal, äfärmükons logis ad slipön slipi
stäatik.

El <Max> älifädom deli jäfädik pötü matedadel söra okik. Änu
äkanom boso takädön pos föl bligas oka as „best man*" ün del memabik
at. Binön gasediman no äbinon vob fasilik, ab äbinon vob, keli el <Max>
ai ädesirom dunön. Ämutom tävön ed äkölkömom menis valasotik nitedik,
va benosevölis u no. Pluo äbinom seliban; kodü atos, no älabom gididisi
votik. Bü yels anik, äprimom in bür gaseda topik as läran; poso ägetom
vobodi nunodana, keli ädunom gudiküno: ab dasteif lemuik oma äbinon
ad seadön fino in stul redakana.

Els <Tabit> e <Max> äbinons ai divodiküns ode. Da lif lölik, no as
gems kösömik, ab as pösods labü flenöfi dibik, äkonfidons ode e neai
älabons klänis. Sekü atos, äkanons fredön dö benoseks, e liedön demü
defs okiks. Nu, das jiel <Tabit> pämatof, dins at äbinons äs büiko. Ed atos
äbinos völadikum, ka äkanons magälön lo utos, kelos suno öjenos.

(Fövoti kanoy reidön ün mul okömöl)

LÖF E TELEGRAM (DIL TELID)
FA HOLGER DRACHMANN

No kanoy dagetön valikosi in vol at dub konsulanatiäd - so äjenos ba in tims repüblikānas bāldik. Ko tiäd Fransānik atimo - in zifil, in lān smalik - no nāmūkon kredi oka, e <Mikkelsen> äbinom ➤pāridikan ➤baik.

Tims vönik gudik efegolons; tims nulik äbinons badiks; prinsips pro ted e kondöt pivotikons. Ba prinsips bāldik at äbinons kalieta vemo gudikum, ab alo: no plu ākanons pagebön. Konsulan ➤pātādom verno, e stüm omik in zifil ➤ādison.

E ven konsulan <Michelsen> no plu äbinom man stümikün zifila, tāno äjenos, das nafadugan <Anton> āprimom ad plöpön.

Äbinom cil palas pöfik.

Ikōmom ini naf e pivobom us so lunūpo jūs stimasen ipubom. Ävilom meritön nulüdi oka ās men snatik, ab no ävilom ➤patōlatön ās dog. Tāno ilüvom nafi ed igolom ini lān, ikolkōmom mani ➤benodālik, kel iyüfom omi konfidü tālens e ➤kalad, kelis āblufom, e pul ivedom man skilik, e nu ikōmom isio lū zifil ed ävegom as disanafadugan in bal nafas gretikum, kels ävegons lū lāns ➤lovemelik.

Suno plöpom so gudiko, das ävedom nafadugan balid in naf, ed ājuitom konfidü lölik kāptena ed i uti nafalabana, kel no voto ➤ātōlatom menis ko ➤spal.

Hiel <Anton> äbinom man yunik e jōnik; atos yufos verno.

So du nifüp in sogs anik ed in klubaledanüd ilogom vomüli <Michelsen>.

Zadik e keinik, legudik in danüd, herem blonik, logs gretik, kels ākanons vedön vemo fleniks e nidiks, - zu nam smalik in gluf redik ed i fut smalik in stog redik, kel āpubon ed ānepubon dis klot - glät ko vin, kel ➤nefādo ➤pāsemufulūkon sui klot ofik bū tabadanüd, sākusads demü atos: „A ! no glifolös dö atos ! ” - e lad nafadugana pifanon.

Älöfom ofi; āmatābegom ed āgetom gepūki : „si”.

X:77:99

Vomül <Bolette Michelsen> pimatarajanof ko nafadugan <Anton>! Atos äbinos jenot lebalik e vero gretik mula, e kludo no äspikoy dö votikos in zifil.

➤Äkagoy. E mot ofik no äbinof ut, kel äneletof givön ➤kage at nulüdi: läd so visedik e so stimadigik änolofo fümiko, das in tefs valif ädunof gönü ok it e daut oka, ven änunof numi utas, kelis ökanof elabön as lüsonis.

If sötoy falön, viloy ye falön ko glori - äs cifs bäldik, kels nemiuko ➤äkesumoms taanis mödik in dead; dö atos vom konsulana ililof dü spikäds seimik.

Das no ätadunof kelosi ijenos, ba äkanos paplänon dub stad konsulana.

Ven nafadugan yunik, ko dredäl gretikum ka ai, äkömom in bür privadik konsulana ed änunom vipi oka, täno konsulan äsumom pokasärvätüli no Fransänik se gun bäldik oka, äseitom nam okik ko drem fibik sui jot dremöl lüsona fütürik oka ed äsagom ome ko vög takedik :

„Nolob, das binol man ritik e dunik; ko fred givob ole dauti oba, e God benedomös olis; ab ün fütür osagob ole: Te mütol lekonfidön oli it. If ba no binob man ➤penosüköl, ed if ba no ogolob ini sep obik as man snatik, so kanob te pos pers lätik, kelis esufob, dajonön obi us as man pöfik. Ab begob oli ad no sagön otosi menes votik.“

Täno nafadugan ipedom nekösömiko fimiko nami konsulana ed ➤imürom vödis ➤nelelilovik anik, e poso konsulan ko logod smililöl ibegom ome ad gölön lü läds.

Kludo ägolom lü vom okik e lü daut ofa.

Yels mödik ipasetikons sis lümot idrenof - äsagoy, das no idrenof ün yels teldegvel - ven kura-bösinatedan regik päsepom. Nu ädrenof, bi läds nolofs, das kanoy sufön valikosi dub drens - ven pagebons ko ➤täm.

Sekü atos, i daut ofa ädrenof.

So nafadugan ästanom us, ba pekofudöl demü drenam.

X:78;99

Lif oma fümiko pidedieton pro luim, ab äbinos su nafadäk, das
kösömo äkomipom ta rein luimik. Lustom ut, keli ispetom ad getön de
konsulan bäldik inepubon ed ivedon stom lejönik.

Kitim rein at änepubonöv-li ?

Rein läto äfinikon; sol äpubon.

Täno vom konsulana ävipol logedön onis ven äkidom dauti ofa. Ed
äkidom ofi ko neskil e kofudam lönik komü lümot. Id ävipof, das
ogolonsöv kobo su cemaglun. Älogedof onis ko fred, e valikos äfinikos in
ladäl teik.

Täno ävisitof famüli oka.

Dub atos lukagam pästopon dü tim anik.

Vomül <Bolette> älifof äs fit in vat, e lümot ilensumof cali ut, kel
binädon me simulön peläsetöli e pardonöli otüpo; stimadig motik, kel
payokon xame, e löf motik, kel vipon setirön gudikosi se din, kel no kanon
pavotön.

„Ag; cil löfik, löf of omi so vemo, e dido, binom vo man jönik e brafik,
e ven no ovedom käpten !” So äsagof ai.

Täno dugan nafa seimik ävedom malädik, ebo ven igetom fledi legud-
ik ed änafof.

VÖDS TEFIK

BAIK	eventual	NELEILOVIK	inaudible
BENODÄLIK	beneficent	NESKIL	awkwardness
BRAFIK	capable, popular	NOSÜKÖN	to destroy
DISÖN	to diminish	PÄRIDIKAN	a ruined (person)
<u>KAGÖN</u>	to gossip	SEMUFULÜKÖN	to spill
KALAD	character	SIMULÖN	to pretend to
KESUMÖN	to take (away) with	SPAL	forbearance
LENSUMÖN	to accept	STIMADIG	dignity, respectability
LOVEMELIK	overseas	TÄDÖN	to threaten
LUKAGAM	malicious gossip	TÄM	moderation
MÜRÖN	to murmur	TÖLATÖN	to treat
NEFÄDO	on purpose	YÖKÖN	to subject

LÄRNOD TELDEGKILID - DÜNOTEM POTIK

Potöps dabinons in zifs e vilags valiks läna. Ab if ek vilon potön penedi u potakadi, no zesüdos ad golön lü potöp; saidos ad jedön penedi ini bal penedabogas dabinöl in tops ömik. Potacalan kobükom potadinis ömikna aldelo. If vilolöv, das pened olik olükömonös vifikumo, potol oni me flitöm ! Atos no ofradon mödo mödikumo. Potadinis pablinons lü dom olik fa penediblinan, e telegrafacalan blünom telegrafotis.

Nügolobsös ini potöp at ! Su föfaglund stanons söl e läd potöls päkedi. Calan vätom oni me vätöm. Fo gijät nedeto söl lofom penedi. Koedom registrarön oni e getom getazöti. Nilü tab deto söl benüpenom fometi potatreta. No pölikolöd tefü gijät, bi operol timi, pato if mens mödik dabinons, e stanons in poodked.

LÄRNOD TELDEGFOLID - IN TELEGRAFABÜR ED IN POTÖP

Givolös obe fometi pro telegrafot ! begö !

Ekö ! o söl ! [u: Is labol oni, o söl !] . . . Vilol - li mäniotön dono nemi e lödöpi ola [u: olikis] ?

Kiöpo penedamäks paremons - li ?

In gijät ko nüm: 2 . . . Pardö ! o söl ! [u: Begob pardi, o söl !]

* * * * *

Kanolöv - li sagön obe, kiöpo potöp binon ?

Pidob osi vemo, ibä i ob no binob de zif at. Ba mögos, das söl et kanom - la nünön ole.

Säkusadolös ! o söl ! Kanol - li nunädön obe, kiöpo potöp binon ?

Si ! klüliko. Gololös ve süt at jü näisüt telid, gololös detio e su laf domakopäda otuvol oni !

Dani mödik ! [u: Danö !]

Dani nonik !

* * * * *

Givolös obe flänükamamäks deg völadü pesodazims teldeg, e teldegmälis völadü pesodazim bal !


Is labol onis, ed is labol reti cänamona.

Dani mödik ! [u: Danö !]



SAP ALDELIK

Löfans mona binons äs mon : düfik, koldik, stenik.



X:80:99

KAPOVÛL RÄTÜKON OBIS

KOBONUMOLÖS TONATIS :

Kanol - li ceinön sökölösi ad numats ?

	D	G	B
	E	I	J
	C	F	H
B	B	A	H

KÄLTIK E SELEDIK :

Velsänik binon pük primik pösodas mödik, kels pemotons in Velsän. Kanol - li tuvön vödis Volapükik baiädik in padül kosik ?

- | | | |
|-----|-----------|------------------|
| 1. | ambiwlans | a) kased |
| 2. | beisicl | ä) taxid |
| 3. | eroplën | b) jul |
| 4. | tacsi | c) malädanivabed |
| 5. | trên | d) flitôm |
| 6. | capel | e) bioskopöp |
| 7. | castell | f) saikul |
| 8. | eglwys | g) temül |
| 9. | sinema | h) glüg |
| 10. | ysgol | i) tren |

HINEF

Söl <Vietik> ävisitom söri oka, jiel <Kristin>. Ävilom golön lü teat.

„Ab sagoy obe. das plösen no binon verno gudik.” äsagof el <Kristin>.

„Ab mutoy ya komön.” äflagedom Söl <Vietik>. „bi hinef oba. hiel <Fred> obinom su städ.”

„Nu. bi no labob hinefi. no ogolob.” Tano. „ab ba ogolob alo.” äsmililof

Rölet kion äbinof - li jiel <Kristin> tefü hinef ? Kikodo äcenof - li cedi oka ?